

Dieus il tutpussent ed ina pintga candeila benedida

Dieus ei ina schi gronda glisch, che nos paupers eglis vegnan tschorventai tras ella. Tuts maletgs e tuttas declaraziuns che nus duvrein per Dieus ein en principi mo muossavias. En negins da quels „havein“ nus Dieus. Tuts maletgs tarmettein nus pil pli sin via tier Diu.

Candeilas benedidas sin l'intercessiun da 'Nossadonna da candeilas' (ils 2 da fevrer) ein simbols dalla glischur da nies Diu. La pintga flomma d'ina candeila benedida sbrenzla bufatg, muossa denton si sin la immensa glisch da nies Diu.


La candeila benedida glischa naturalmein buc auter che ina candeila senza benedicziun. Mo tras nossa cardientscha ha ina candeila benedida ina pli gronda valeta. Envidar ina tala candeila envida nus da far in per patratgs; ch'il Segner ei la glisch dil mund, ed el porta era leu glisch, nua che tut ei stgir q.v.d. senza speranza.



Sauns – oravontut sauns dil culiez vulein nus esser, ni vegnir tras la benedicziun da s. Plasch (sia fiasta ei ils 3 da fevrer). Era cheu duvrein nus cardientscha e fidonza. Ils miedis dian era, ils pazients che sefidan buca ch'il medicament ch'els survegnan gidi els, biars da quels pazients restan malsauns. La benedicziun da s. Plasch fa buc (adina) miracles. Quei ei buca „magia“, mo quella benedicziun muossa la fidonza, che tut ei els mauns da Diu e nus vulein sefidar e supplicar el, ch'el detti a nus ina buna sanadad.

Paun benedius sin l'intercessiun da sontga Gada (sia fiasta ei ils 5 da fevrer) gusta buc' auter sco paun senza benedicziun. Era cheu vul la benedicziun gidar nossa cardientscha d'ir

entuorn cun paun cun grond engraziament. Il paun ei in simbol pert tut quei che nus duvrein en nies mintga di. Aschia ei la benedicziun dil paun dalla fiasta da sontga Gada ina supplica, che nus rughein pert tut quei che nus duvrein, ed engraziein per tut quei che nus havein.




Tuttas treis benedicziuns han pia nuot da far cun striegn, mobein cun la fidonza el Segner ch'ei adina cun nus. Nus cartein en el e sefidein da sia protecziun era cun l'intercessiun da Nossadonna, da sogn Plasch e da sontga Gada.

Fidonza ei ina oasa dil cor, la quala la caravana da dubis vegn mai a contonscher.

Jeu giavischel a vus tuts in matg fluras plein fidonza.

Vies sur Peter

„Ensemen“



Sut quei tetel ha liug mintgamai naven dil fevrer ina sentupada surregionala da juvenils. La purschida religiosa cumpeggia las pleivs catolicas da Laax-Falera sur Flem-Trin a Panaduz-Rhazén tochen Domat-Favugn. Plidentai ein oravontut juvenils dalla 5. e 6. classa. Ils invits vegnan repartgi duront las uras da religiuin. Il cuntegn da quellas sentupadas ei oravontut la promoziun dalla cuminonza a

moda amicabla, denton era ina purschida cun aspects religius. Nus sperein che nos juvenils anflien bien contact e bia plascher el ravugl da quellas sentupadas.

Informaziuns per Laax

Communiun dils malsauns:

Mesjamna, ils 08-02-2012 suentermiezdi

Benedicziun dil culiez per ils affons e lur mummas

Cordial invit a tuttas mummas e lur affons a quella devoziun che ha liug mesjamna, igl 1. da fevrer 2012 allas 16.00h.

Fiasta dil s. Batten

Dumengia, ils 12 da fevrer 2012 retscheiva *Serafin*, fegl da Simon e Ladina Caviezel-Meiler, il sogn sacrament dil Batten. Nus gratulein cordialmein alla famiglia e beneventein *Serafin* ella cuminonza da nossa Baselgia. La benedicziun da Diu ed il sustegn dils concertents accumpogni el tras sia veta.

Cordiala gratulaziun

Gliendisdis, ils 13 da fevrer 2012 festivescha *Hans Moser* siu 90-avel natalezi. Nus tarmettein nos megliers giavischs per buna sanadad e plascher ella veta da mintgadi a Trun en Casa s. Martin, nua ch'el ha priu sia dimora.

Cant dils 3 Retgs: Cordial engraziament

Alla grappa dils 3 Retgs, allas scolastas, ed a tuttas persunas che han collaborau per possibilitar il cant dils 3 Retgs e la sentupada denter vischins els quartiers, admettein in grond Dieus paghi. – Il recav va en favur da «Cristo Obrero» Peru, che procura da megliurar la situaziun d'affons e giuvenils en miseria.



Concert «Winterreise»

Dumengia, ils 26-2-2012 allas 17.00h en baselgia, pudein nus udir da Franz Schubert, in cyclus da canzuns da Wilhelm Müller. Il tenor Reto Hofstetter vegn accumpignaus al piano da nies organist Dirk Sauer.

Informaziuns per Falera

Communiun dils malsauns:

Venderdis, ils 03-02-2012 suentermiezdi
Gievgia, ils 16-02-2012 suentermiezdi

Benedicziun dil culiez per affons e lur mummas

Tuttas mummas e lur affons ein cordialmein envidadas a quella devoziun che ha liug mardis, ils 7 da fevrer 2012 allas 16.00h.

Benedicziun dil paun da s. Gada, dallas candeilas e la benedicziun da s. Plasch – nus recumandain a vus, cars parochians, quels survetschs divins che nus celebren en connex cun la benedicziun.

Cordial engraziament als «3 Retgs»

Nos «3 Retgs» han danovamein visitau las familias e delectau cun lur cant. Ad els ed a lur scolast Carli Blumenthal engraziein zun fetg per tonta bunaveglia demussada. Entras quei agir ed entras vossas donaziuns beinvulentas vegnan affons en pitgiras susteni en lur miseria. Dieus paghi a tuts!

Aduraziun da 40 uras

Per l'emprema dumengia da Cureisma, ils 26-2-2012, essas vus tuts cordialmein envidai tier l'aduraziun comunabla avon il Sontgissim.

09.00h

09.45h - 10.30h Francrengia/ Plaunca/ Chistiala

10.30h - 11.15h Dual/ Scarsalius/ Giaus

11.15h - 12.00h Canal/ Bignerass/ Manduns

12.00h - 12.45h Paliu/ Erliung/ Crap Gries

12.45h - 13.30h Fontaunas/ Stonas/ Surjert

13.30h - 14.00h Bigliac/ Gliendras/ Encarna

14.00h

s. Messa dalla dumengia

Devoziun e reposiziun